

Date – 12/06/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Mizoram Sports Conclave chu vawiin khan Aizawlah Chief Minister Pu Lalduhoman a hawng.
2. Rajya Sabha MP Pu K Vanlalvena chuan furpui thlen tak tak hmaa Mizoram buhfai tla tur chhekkhawl turin FCI chuan nasa takin tan a la a ti.
3. BJP hruaitu senior Pema Khandu chu a zawna term thum nan vawiin khan Arunachal Pradesh Chief Minister atan rinawmna thutiam tira lakluh a ni.
4. Sawrkar laipui chuan NEET-UG,2024 exam neih zawh taka grace mark mi 1500 chuang hnena an pek chu sut leh vek anih tur thu Supreme Court a hrih.

<><><>

SPORTS CONCLAVE

Mizo infiammi ten Olympic an hmachhawn ve theihna tura inbuatsaihna hmasa – Mizoram Sports Conclave chu vawiin khan Aizawl Falkland Venga Baptist Center-ah neih a ni a, Chief Minister Pu Lalduhoman a hawng.

Thusawiin Chief Minister chuan Vision 2036 Olympic chu sorkar policy ni turin ruahmanna kalpui mek a ni a ti a, Sports Conclave chu Mizoram leh India-in infiamna lama a duhthusam a thlen dik theih nana rahbi pawimawh hmasa, zinkawng bul intanna a ni a, Olympic 2036 a lo thlen hunah Mizo infiammi tam zawk an inlan theihna tur leh, khawvel infiammi ropui leh a tha ber berte nena inelna hmachhawn thei tura inchher chhuahna tura hmalakna hmasa a ni, a ti.

Pu Lalduhoma chuan Mizote chuan infiamna chi hrang hrang an ngaina hle tih sawiin, an nunphuga bet tel tlat a ni a ti a, hlawhtlinna inlawmpui hun leh chak lohna intawrhpuina hmun a ni tih sawi bawkin, infiamna chu inunauna leh inpumkhatna siamtu pawimawh a ni tih a sawi bawk.

Sports Minister Pu Lalnginglova Hmar chuan Mizoram Sports Conclave chuan rah tha a chhuah a beisei thu sawiin, tuna naupang kum 8 atanga kum 15 velte chu Olympic 2036 a thlen hun a an vanglai hmang tur an ni a ti a, chung mite tana kawng lo sial chu hna pawimawh a ni tih sawiin, taksa leh rilru bakah hmunhma tha nei tura hmalak a pawimawh tih a sawi. Olympic awm tawhte thlirin ram lian leh rethei te pawhin infiammi tha tak tak an nei thei a ti a, chung mite ang chuan Mizote pawhin an tih awm chi leh tha an thlan thiam a pawimawh tih a sawi bawk.

Mizoram Sports Conclave-ah hian Mizoram chhunga infiammi langsar hrang hrang chawl tawh leh la infiam mekte bakah sports association hruaitu te an tel a. Rampum huapa infiamna hruaitu lawk tak tak leh hmarchhak state atangin Assam Sports Minister Nandita Garlosa, Meghalaya Sports Minister Shakliar Warjri leh Manipur Sports Minister Govindas Konthoujam te an lo kal a, infiamna lama

hmasawna tur pawimawh hrang hrang te an sawi khawm a, naktukah pawh hun hman chhonzawm tur a ni ang.

<><><>

CM AWARD

Chief Minister Pu Lalduhoman Education Department-in pawl 10 leh pawl 12-a 1-na te chu Chief Minister's Award vawiin khan a hlan a, hemi puala inkhawm Aizawl Vanapa Hall a buatsaih ah hian Education Minister Dr. Vanlalhlana pawh a tel a ni.

Chief Minister hian, topper te chu lawmpuiin lawmman dawng thei khawpa an hlawhtlin chhan chu an taihmak vang a ni a ti a. Talent nei tha mahse mi a taihmak loh chuan hnehtu an ni thei ngai lo a ti a, chawimawi tlaka titha te an chawimawi lai hian kha exam-a pass zo ve ta rih lo te pawh an hrereng a, lo beidawng reng reng lo turin a ngen tih a sawi a ni. Vawi hnih khat hlawhchham chu beidawnpui tham chhiatna a ni ngai lova; nasa zawka hlawhtling tura inbuatsaihna mai a ni a ti.

Dr. Vanlalhlana pawhin thusawiin, zirlai sing chuang zinga a titha ber nih theih chu a ropui a. An hlawhtlinna phenah thawhrimna leh tumruhna a hmuh theih a, chu chu a entawntlak a, a ngaihsanawm a ni, a ti a. An kal zelna turah duhsakna a hlan. Minister hian zirlaite zingah communication skill leh leadership lam inzirtirna uar deuh deuh tha a tih thu pawh a tarlang.

He Award hi School Education department hian kum 11 an lo kalpui tawh a, quality education a awm theih nana sawrkar policy pakhat niin senso tur pawh Budget ah dah a ni.

Chawimawina hlan te chu:

- 1. HSLC topper: Lalmoipuia Lawmzual Aizawl, St. Paul's HSS
- 2. HSSLC topper in Arts: Linden Lalremruatpuia, Oikos HSS
- 3. HSSLC topper in Commerce: David Lalhminghlua St. Paul's HSS
- 4. HSSLC topper in Science: Lalramdina Ralte Aizawl. St. Paul's HSS te an ni

a.

Lawmman hian tangka fai Rs. 50000 leh Citation a keng a ni.

<><><>

RS MP

Rajya Sabha MP Pu K Vanlalvena chuan furpui thlen tak tak hmaa Mizoram buhfai tla tur chhekkhawh turin FCI chuan nasa takin tan a la a ti a,

He thu hi wawiina Food Corporation of India Consultative meeting-ah sawiin Pu K. Vanlalvena chuan mipuiin an rinpui ber buhfai ngah tawk a tul thu sawiin, leimin, tuilian leh harsatna dang ten buhfai chhekkhawh tibuai lo turin tan lak a ni a ti.

Pu K Vanlalvena chuan Sairanga rel a lo luh hma ngeia Sihhmui a FCI kudam sak lai mek chu peih ngei a pawimawh a ti bawk a.

Sihhmui a FCI kudam sak lai mek za a 60 thawh zawh tawh chu Forest Department lamin Riverine Forest Reserve chhunga a awm an tih avanga a sak lai an chawhhtir avangin peih vat theih a nih loh thu leh hemi chunghangah hian indawrna a kal mek thu a sawi a, Mizoram sorkar nen pawh hmalak a nih thu leh MINECO ramah Food Corporation of India Divisional Office tur hmun pawh nikum hmasa lama dilna thehluk a nih tawh thu a sawi.

Rajya Sabha MP chuan FCI Godown Sairang a sak mekah buhfai quintal nuai 1 a len thu sawiin tuna Bairabi rel thlen chin atanga FCI kudam panna kawngpui meter 300 vela hla chu a kawng a chhiat deuh avangin buhfai thiar a chak theih loh thu a sawi bawk.

Mizoram FCI Consultative Committee Chairman Pu K. Vanlalvena chuan kum 2024 June thla atanga August thla theng daih tur Mizoram FCI kudam atanga Mizoram hmun hrang hranga ration buhfai sem chhuah tur metric tonn 15,260 vel phurh chhuah a nih tawh thu sawiin Mizorama FCI kaltlanga buhfai phurh luh chu Quintal 1,75,590 a nih thu a sawi a, Khawzawl-a FCI kudam sak mek Mizoram Sorkarin a hmun kum 22 chhung chauh a pek pawh kum 99 a pawh sei a nih tawh thu a sawi bawk.

<><><>

HORTI MINISTER

Sorkar laipui Ministry of Agriculture & Farmers Welfare atangin Mizoram Horticulture Department hmalakna hrang hrang te hmuhpui turin Central Team Member te an rawn kal a, Additional Commissioner hoin Sairang Bamboo Processing Centre, leh Zo-Anthurium Growers Co-operative Society (ZAGCS) Collection Centre, Ramhlun North, Aizawl te an tlawh hnuah vawiin khan Rb McCabe Hall, Aijal Club-ah Horticulture Minister Prof. Lalnilawma hovin Meeting neih a ni a. Meeting hi Pu C.H. Lalmuanpuia, Director of Horticulture-in a kaihruai.

Meeting-ah hian District hrang hrang leh Centre of Excellence (CoE), Thingdawl leh Lunglei te atangin an hmalakna thlir ho a ni a. Horticulture hnuai Stakeholder hrang hrangte hnen atangin an hmalakna thlir ho nghal a ni.

Horticulture Minister Prof. Lalnilawma chuan Central Team-in Aizawl mai bakah Serchhip-a Zawlpui lam thlenga an kal thei chu an inpekna fakawm a tih thu a sawi a, policy maker ten an tawn hriat atangin state bil mil chi leh mamawh an zir chhuah ngei a rin thu a sawi a. Tuna Department-in Scheme a kalpui mek bakah hian hmasawn leh zual nan puih kan ngaihna lai apiangah min pui a, hmasawna tur a tanho a tul tih a sawi.

Ministry of Agriculture Additional Commissioner Dr. Naveen Kumar Patle, chuan Central-a policy duangtu an nih laiin a chhawrtute nen hun hman fo a tul thu te, heng atang hian sorkar policy thar duan a fuh ber thu a sawi a. Tuna India rama Cluster Horticulture Development hmalakna kal mekah Mizoram pawh a tel ve theih thu sawiin, Anthurium cluster, Dragon fruit cluster leh Serthlum cluster te chu hmuh a chakawm thu a sawi a, Mizoram chu dragon fruit ching zingah a rah a tui bik zia sawiin Dr. Patle chuan India ram pum huapa Dragon Fruit Conference Mizoram ah nghah ni thei se a ti a, chutiang tur chuan hmalak a rawt nghal a ni.

Central Team-te hian nimin khan Centre of Excellence for Vegetable hmun tur Mat-kam, Serchhip District chu tlawhin Mat Zawlpui zau-a huan siamtute nen an huan hmunah inkawmhona hun tha tak an hmangho bawk a ni.

<><><>

AP CM

BJP hruaitu senior Pema Khandu chu a zawna term thum nan vawiin khan Arunachal Pradesh Chief Minister atan rinawmna thutiam tira lakluh a ni.

Itanagar-a DK Convention hall-a lakluh inkhawmah Pu Khandu rual hian Cabinet minister 11 lakluh tel an ni a.

Arunachal Pradesh Governor Lt.Gen. KT Parnaik chuan Chief Minister lakluh hi a kaihruai a ni.

State Cabinet Minister atana lakluhte hi Chowna Mein, Byuram Bage, Nyato Dukam, Gabriel D Wangshu, Wangki Lowang, PD Sona, Mama Natung, Smt Dasanglu Pul, Balo Raja , Kento Jini leh Ojing Tasing te an ni a.

Chief Minister lakluh inkhawmah hian Union Home Minister Amit Shah, Health Minister JP Nadda, Ravi Shankar Prasad, Assam leh Sikkim Chief Minister, Arunachal East Parliamentary Constituency MP Tapir Gao te pawh an tel a ni.

Arunachal Pradesh Assembly inthlan neih zawh takah khan BJP hian seat 60 ah seat 46 an la a ni.

<><><>

NEET UG 2024

Sawrkar laipui chuan NEET-UG,2024 exam neih zawh taka grace mark mi 1500 chuang hnena an pek chu sut leh vek anih tur thu Supreme Court a hrih.

Sawrkar laipui leh National Testing Agency chuan Supreme Court Vacation bench Justice Vikram Nath leh Sandeep Mehta te awmna chu he thutlukna hi hrihlin zirlai 1563 te hnena grace mark lo pek tawh chu sutin June ni 23 ah hian test nawn phalsak an ni dawn tih tarlan a ni.

Hetihlai hian Supreme Court chuan NEET UG 2024 admission counselling neih tur chu tih khawtlai a tum lo tih a puang thung a ni.

<><><>